

Peqqussutissatut siunnersuummut nassuiaatit

**Nalinginnaasumik nassuiaatit**

*1. Allanguutissatut siunnersuutip siunertaa*

Meeqqat inuusuttuaqqallu peqqinnissakkut sullinneqarnerat pillugu maleruagassiat erseqqinnerusut nalunaarutitut iluseqartinneqarsinnaanissaat Naalakkersuisut kissaatigaat. Taamaattumik Peqqinnissaqarfiup sullissineri il.il. pillugit peqqussummi § 11 aamma § 12 atorunnaarsinneqassasut peqqinnissakkullu sullinneqarneq pillugu maleruagassanik nalunaarutikkut Naalakkersuisut aalajangersaasinnaanissaannut inatsisitigut tunngavissat pilersinneqassasut siunnersuutigineqarpoq.

*2. Allanguutissatut siunnersuutip imai pingaarnerit*

Allanguutissatut siunnersuutip kingunerissavaa peqqinnissakkut sullinneqarneq pillugu maleruagassat nalunaarutitut ilusilerlugit Naalakkersuisunit aalajangersarneqarsinnaaneritut inatsisitigut tunngavissat pilersinneqarnissaat.

§§ 11 aamma 12 atorunnaarsinneqassapput, tamatumalu kingorna Kapitali 4-p imarilissallugit meeqqat inuusuttuaqqallu peqqissusaannik misissuinissamik, peqqinnissakkut sullinneqarnissamik akiuussutissinneqartarnissamillu neqerooruteqartarnissat, tamatumanilu maleruagassat erseqqinnerusut Naalakkersuisunit aalajangersarneqarsinnaalissallutik.

*3. Allanguutissatut siunnersuutip aningaasaqarnikkut allaffissornikkullu kingunissai*

Allanguutissatut siunnersuut aningaasaqarnikkut allaffissornikkullu kinguneqassangilaq.

*4. Pisortani oqartussat kattuffiillu il.il. tusarniaavigineqarnerat*

Allanguutissatut siunnersuut ukunani tusarniaassutigineqarpoq:

Aningaasaqarnermut Pisortaqarfik  
Aqutsinermut Pisortaqarfik  
Kultureqarnermut, Ilinniartitaanermut Ilisimatusarnermut Ilageeqarnermullu  
Pisortaqarfik  
Aalisarnermut, Piniarnermut Nunaqarfinnullu Pisortaqarfik  
Ilaqutariinnermut Pisortaqarfik  
Peqqinnissaqarfiup Peqqissaaveqarfinnik Aqutsivia  
Dronning Ingridip Napparsimmavissua  
Peqqinnissakkut Nakkutilliisoqarfik  
Peqqissaanermik Ilinniartarfik (PI)  
KANUKOKA  
Peqqinnissaq Pillugu Kattuffiit (PK/PPK)  
Kalaallit Nunaanni Nakorsat Peqatigiiffiat  
Kigutilerisut Peqatigiiffiat  
Kalaallit Nunaanni Perorsaasut ilinniarsimasut Peqatigiiffiat (PiP)  
Kalaallit Nunaanni Ilinniartitsisut Peqatigiiffiat (IMAK)  
Kalaallit Nunaanni Sulisitsisut Peqatigiiffiat  
Tusarniaavagineqartut oqaaseqaateqanngillat.

## **Peqqussutissatut siunnersuummi aalajangersakkanut ataasiakkaanut nassuiaatit**

### *§ 1-imut*

Nr. 1-imut 2-mullu.

Siunnersuutigineqarpoq Peqqinnissaqarfiup sullissineri il.il. pillugit peqqussummi atuuttumi § 10 imm. 1-ip kingornatigut immikkoortumik nutaamik ilanngussisoqassasoq, tamatumani meeqqat inuusuttuaqqallu aammalu suli atualinngitsut atuartussaataasutullu ukiullit peqqinnissakkut sullinneqarnissamut akiliutitaqanngitsumik neqeroorfigineqalissallutik. Taamatut neqerooruteqarneq maannamut § 11-mi aamma § 12-imi maanna atorunnaarsinneqartuni nassuiarneqarpoq.

Meeqqat inuusuttuaqqallu peqqinnissakkut sullinneqarnissaminnut pisinnaatitaanerat ajornerulersinneqassasoq siunertarineqanngimmat peqqissutsimik misissuinissaq peqqinnissakkullu sullinneqarnissaq pillugit maleruagassanik imaqartumik Naalakkersuisut aalajangersaasinnaanerat § 10, imm. 3-mi inatsisitigut tunngavissinneqassaaq. Peqqinnissakkut sullinneqarneq pillugu malittarisassanik Naalakkersuisut aalajangersaasinnaansaataat siusinnerusukkut inatsisitigut tunngavissaqarsimangilaq. Tamatumunnga malittarisassat taamaallaat § 11-mi aamma § 12-imi maanna atorunnaarsinneqartuni aalajangersarneqarput.

*§ 2-mut*

Siunnersuutigineqarpoq allannguutissatut siunnersuut 1. februar 2005-imi  
atuutilersinneqassasoq.